



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

### **Arnoldi Corvini à Belderen J. U. D. Jus Canonicum, Per Aphorismos Strictim Explicatum**

**Corvinus van Beldern, Arnold**

**Amstelodami, 1663**

Vita & honestate Clericorum.

**urn:nbn:de:hbz:466:1-10591**

*De vita & honestate Clericorum.*

## T I T. XXVII.

**C**ongruit omnibus Clericis, ut quemadmodum in sortem Domini sunt vocati, & à populo officiis & ordinibus sunt divisi: ita & summâ ope nitantur, vitæ honestate cæteris præcellere.

Est *vita honestas*, agendi dexteritas, quâ hominis animus ita informatur, ut detestando vitia, ea quæ cum virtutibus congruunt, amplectatur. *Venat. in Analys. hoc tit.*

Ea est, vel *Interna*; quæ est animi probitas; quâ præditi cupiunt ex juris & virtutum præscripto vivere: vel *Externa*; quæ in externis secundum virtutem actionibus consistit.

Utramque ut observent Clerici, certæ *de eorum negotiis & officiis, moribus & vita, habitu & vestitu*, regulæ Canonibus traduntur.

*Circa negotia & officia*, Ne officia vel commercia secularia; ut mercaturam, *c. secundum. 6. ne cler. vel monach.* procuracionem laïcorum, *c. Sacerdotibus. 2. ne cler. vel mon. Clem. 1. eod.* tabellionatum, *c. sicut. 8. eod.* chirurgiam quæ inustionem vel incisionem inducit, *c. sententiam. 9. eod.* exercent; mimis, jocularibus & histrionibus non intendant; *c. clerici. 15. hic.* quicquam per quod ad vindictam sanguinis tenditur, exercent; *d. c. sententiam. 9.* sylvaticas venationes cum canibus, nec accipitres, falcones, habeant: *c. omnibus. de cler. venat.* ne Juri Civili, *c. fin. ne cler. vel mon.* nisi ut facilius Canonicum Jus intelligant, operam dent; *Gomez. ad reg. Cancell. regul. de jure quas. nox toll. qu. 3. circa fin.* Contra si faciant, & tertio moniti non absistant, privilegiis omnibus privantur; & quandoque severius puniuntur. *d. c. fin. Clem. 1. hic.*

*Circa vitam & mores*; ut concubinas non habeant, *c. præter hoc. 6. dist. 32. ubi Gl. 1.* sed extra matrimonium casti-

castitatem; *c. diaconus. 1. §. hęc auctoritate. dist. 27.* vel in matrimonio, si sint Orientales, *c. ut clericorum. 13. hic.* fervent; ut & modum in cibo & potu, *dist. 35. per tot.* id est, eum, licet delicatum, pro sustentatione corporis ingerant, *c. quisquis. 1. §. nam in omnibus hujusmodi. dist. 41.* ebrietati non sint dediti, *d. dist. 35. per tot.* nec alios ad bibendum incitent: *c. à crapula. 14. hic.* nec bibendi vel edendi causâ tabernas, nisi peregrinentur, intrent; *c. Clerici. 15. eod. c. Clerici. 4. dist. 44.* nec aleis ludant; nec aleatoribus intersint, *d. c. Clerici. 15. hic.*

*Circa habitum corporis & vestitum;* ut vestium & ornamentorum, quæ Clericorum usui sunt, formam præfinitam servent; *c. Clerici. 15. hic.* comam nec barbam nutriant, *c. Clerici. 15. & c. si quis. 4. eod.* nec vestibus, nec calceamentis decorum quærant, *c. Clericus. fin. dist. 41.* Contra si sine justa causa fecerint, beneficii, si habent, fructibus, semestri spatio privantur; si non habent, sex mensibus ad Ecclesiasticum beneficium adspirare vetantur: si sint in dignitate constituti, aut beneficium curatum vel personatum habeant, anni unius fructuum jacturâ multantur. *Clem. fin. hic.*

Hęc omnia ut melius servent, prohibitum iis simul cum mulieribus, de quibus incontinentiæ suspicio esse possit, *c. 1. cum sim. de cohab. cleric. & mulier. habitare;* Matrem, sororem, amitam, neptem, in quibus naturale scœdus nihil permittit sævi criminis suspicari, domi habere possunt. *c. à nobis. 9. eod. c. interdixit. 16. dist. 32.* Nisi secum ancillas & pedissequas ducant. *c. 1. eod.*

*De visitatione per Prælatos facienda.*

TIT. XXVIII.

**U**T Clerici omnes, ut & Laici, à vitiis, animarum salutis obfuturis, abstineant, debent Prælati, jurisdictionem habentes, *Abb. c. cum Apostolus. 3. no. de censib. loca sibi subjecta, quolibet anno, semel invisere; c. 14. decrevimus.*